

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

ঢাকা, সোমবার ১৭ অক্টোবর ২০১৬, ২ কার্তিক ১৪২৩

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। সন্ত্রাসবাদ দমনে এক হয়ে কাজ করার আহ্বান
: ব্রিকস-বিমসটেক সম্মেলনে প্রধানমন্ত্রী
- ২। বিমসটেকভুক্ত দেশগুলোর মধ্যে মুক্তবাণিজ্য অঞ্চল গঠনের আহ্বান প্রধানমন্ত্রীর
- ৩। প্রধানমন্ত্রী শেখ হাসিনার সন্ত্রাসবিরোধী পদক্ষেপের প্রশংসা ভারতের প্রধানমন্ত্রী নরেন্দ্র মোদীর
: ভারতের গোয়ায় দ্বিপাক্ষিক বৈঠক
- ৪। প্রযুক্তির ব্যবহারে খাদ্য উৎপাদন বেড়েছে : অর্থমন্ত্রী
তিন দিনব্যাপী খাদ্যমেলা শুরু
- ৫। জলবিদ্যুৎ কেন্দ্র স্থাপন করবে বাংলাদেশ ও নেপাল
- ৬। আগামী ৩০ ডিসেম্বরের মধ্যে ট্যানারি না সরালে
গ্যাস, পানি ও বিদ্যুৎ সংযোগ বন্ধ করা হবে : শিল্পমন্ত্রী
- ৭। তিন দিনের সফরে ঢাকায় বিশ্বব্যাংক প্রেসিডেন্ট
- ৮। যারা ভবিষ্যতের স্বপ্ন দেখে, তারাই ভবিষ্যৎ বিনির্মাণে সক্ষম
সাউথ এশিয়ান ইকোনমিক সামিটের সমাপনী অনুষ্ঠানে স্পিকার
- ৯। তথ্যপ্রযুক্তি মেলা 'ডিজিটাল ওয়ার্ল্ড-২০১৬' শুরু হচ্ছে আগামী ১৯ অক্টোবর
- ১০। বিশ্ব ক্ষুধা সূচকের তালিকায় বাংলাদেশ ৯০তম
- ১১। দেশের ১৮ জেলায় আরও ২৩টি বেসরকারি কলেজ জাতীয়করণ হচ্ছে

১। সন্ত্রাসবাদ দমনে এক হয়ে কাজ করার আহ্বান

: ব্রিকস-বিমসটেক সম্মেলনে প্রধানমন্ত্রী

প্রধানমন্ত্রী শেখ হাসিনা ব্রিকস-বিমসটেকভুক্ত দেশগুলোর টেকসই উন্নয়ন, শান্তি ও স্থিতিশীলতার জন্য সংস্থা দুটির মধ্যে ঘনিষ্ঠ সহযোগিতার আহ্বান জানিয়েছেন। একই সঙ্গে তিনি সন্ত্রাসবাদ ও সহিংস জঙ্গিবাদ মোকাবিলায় এই দুই সংস্থার সদস্য দেশগুলোকে একত্রে কাজ করারও আহ্বান জানান। প্রধানমন্ত্রী গতকাল ১৬ অক্টোবর রোববার ব্রিকস-বিমসটেক আউটরিচ সামিটে ভাষণদানকালে নিম্ন আয়ের দেশগুলোর সুযোগ-সুবিধার দিকে বিশেষ নজর দিতে ব্রিকস নেতাদের প্রতি আহ্বান জানান। প্রধানমন্ত্রী শেখ হাসিনা ব্রিকস ও বিমসটেকের ঘনিষ্ঠ সহযোগিতার জন্য সুনির্দিষ্ট ৩টি পন্থা অনুসরণের পরামর্শ দিয়ে বলেন, সহযোগিতার জন্য পারস্পরিক সম্ভাব্যতা ও যৌথ কর্মপন্থা নির্ধারণের এটাই সময়। প্রধানমন্ত্রীর এই ৩ পরামর্শ হচ্ছে : (১) মানসম্পন্ন ও টেকসই অবকাঠামো উন্নয়নে গুরুত্ব দেওয়া (২) প্রযুক্তির জন্য বৃহত্তর সহযোগিতা কর্মসূচি চালু এবং (৩) স্থিতিশীল অর্থনৈতিক প্রবৃদ্ধির লক্ষ্যে সংলাপের প্রক্রিয়া শুরু করা। তিনি টেকসই উন্নয়নের জন্য শান্তি, নিরাপত্তা ও স্থিতিশীলতার ওপর গুরুত্বারোপ করে বলেন, টেকসই উন্নয়নে আমাদের সব প্রচেষ্টা শান্তি, নিরাপত্তা ও স্থিতিশীলতার ওপর নির্ভরশীল। সূত্র-সংবাদ (পৃ.১,ক.৫), ইত্তেফাক (পৃ.১,ক.৪), ডেইলি সান, (পৃ.১,ক.১)। এশিয়ান এজ, অবজারভার এ বিষয়ে লিড নিউজ ছেপেছে। অবজারভার, ডেইলি স্টার এ বিষয়ে ছবিসহ খবর ছেপেছে।

২। বিমসটেকভুক্ত দেশগুলোর মধ্যে মুক্তবাণিজ্য অঞ্চল গঠনের আহ্বান প্রধানমন্ত্রীর

বিমসটেকভুক্ত দেশগুলোর মধ্যে বাণিজ্য বাড়াতে মুক্ত বাণিজ্য অঞ্চল গঠনের পরিকল্পনা বাস্তবায়নের ওপর জোর দিয়েছেন প্রধানমন্ত্রী শেখ হাসিনা। ভারতের গোয়ায় ব্রিকস-বিমসটেক আউটরিচ সামিটের আগে গতকাল ১৬ অক্টোবর রোববার বিমসটেক নেতাদের রিট্রিটে অংশ নিয়ে এ আহ্বান জানান তিনি। বিমসটেক মুক্ত বাণিজ্য অঞ্চল গঠনের আলোচনা শুরুর পর একযোগে পেরিয়ে গেলেও চুক্তি চূড়ান্ত না হওয়ায় বিষয়টি এ অঞ্চলের নেতাদের আন্তরিকতাকেই প্রশ্রয়িত করে বলে মন্তব্য করেন প্রধানমন্ত্রী। তিনি বলেন, এফটিএ বাস্তবায়নের পক্ষে আমাদের রাজনৈতিক সদিচ্ছা পুনর্ব্যক্ত করতে হবে। এটা আমাদের আন্তঃআঞ্চলিক বাণিজ্য বৃদ্ধিতে সহায়তা করবে এবং বিমসটেকের কার্যক্রম ও কর্মসূচিগুলো জোরদার করবে। সূত্র-জনকণ্ঠ (পৃ.১,ক.৪), ইত্তেফাক (পৃ.১,ক.৪), ইন্ডিপেনডেন্ট (পৃ.১,ক.২), বাংলাদেশ টুডে (পৃ.১,ক.২)। সমকাল, ভোরের কাগজ, নিউ নেশন এ বিষয়ে লিড নিউজ ছেপেছে।

ভোরের কাগজ, সংবাদ, যুগান্তর, ইন্ডিপেনডেন্ট, ডেইলি সানসহ অধিকাংশ পত্রিকা এ বিষয়ে ছবিসহ খবর ছেপেছে।

৩। প্রধানমন্ত্রী শেখ হাসিনার সন্ত্রাসবিরোধী পদক্ষেপের প্রশংসা ভারতের প্রধানমন্ত্রী নরেন্দ্র মোদীর

: ভারতের গোয়ায় দ্বিপাক্ষিক বৈঠক

প্রধানমন্ত্রী শেখ হাসিনার সন্ত্রাসবিরোধী পদক্ষেপের ভূয়সী প্রশংসা করেছেন ভারতের প্রধানমন্ত্রী নরেন্দ্র মোদী। গতকাল ১৬ অক্টোবর রোববার ভারতের গোয়ায় প্রধানমন্ত্রী শেখ হাসিনার সঙ্গে বৈঠকে প্রধানমন্ত্রী মোদী এই প্রশংসা করেন। সন্ত্রাসবাদ রোধে দুই দেশ এক সঙ্গে কাজ করার অঙ্গীকার করেছে। বৈঠকে তিস্তার পানি বন্টন চুক্তি নিয়েও আলোচনা হয়েছে। তিস্তা চুক্তির ব্যাপারে বাংলাদেশ যথেষ্ট আশাবাদী। বৈঠকে আনুষ্ঠানিকতা বাদ দিয়ে কিভাবে দুই দেশের প্রধানমন্ত্রীর মধ্যে আলোচনা হতে পারে সেই বিষয়টি আলোচনায় আসে। সূত্র-ইত্তেফাক (পৃ.১,ক.৬), সমকাল (পৃ.১,ক.১), ইন্ডিপেনডেন্ট (পৃ.১,ক.৫), ডেইলি সান, (পৃ.১,ক.৪)।

ইত্তেফাক, যুগান্তর, সমকাল, এশিয়ান এজ, ডেইলি স্টারসহ অধিকাংশ পত্রিকা এ বিষয়ে ছবিসহ খবর ছেপেছে।

৪। প্রযুক্তির ব্যবহারে খাদ্য উৎপাদন বেড়েছে : অর্থমন্ত্রী

তিন দিনব্যাপী খাদ্যমেলা শুরু

অর্থমন্ত্রী আবুল মাল আবদুল মুহিত বলেছেন, 'জমির ব্যবহার কমলেও প্রযুক্তির ব্যবহারে খাদ্য উৎপাদন বেড়েছে। আমরা এক সময় ১ কোটি ১০ লাখ টন চাল উৎপাদন করতাম। এখন ৩ কোটি ৮০ লাখ টন উৎপাদন করছি। শীঘ্রই ৪ কোটি টন চাল উৎপাদন করব।' গতকাল ১৬ অক্টোবর রোববার খাদ্যমেলার উদ্বোধন অনুষ্ঠানে প্রধান অতিথির বক্তৃতায় তিনি এ কথা বলেন। এ সময় কৃষিমন্ত্রী মতিয়া চৌধুরী ও খাদ্যমন্ত্রী কামরুল ইসলাম উপস্থিত ছিলেন। সূত্র-যুগান্তর (পৃ.১৫,ক.৬), সংবাদ (শেষ পৃ.,ক.৩), প্রথম আলো (পৃ.৫,ক.৪)।

৫। জলবিদ্যুৎ কেন্দ্র স্থাপন করবে বাংলাদেশ ও নেপাল

নেপালের সাথে যৌথভাবে জলবিদ্যুৎ কেন্দ্র স্থাপন করবে বাংলাদেশ। প্রাথমিকভাবে দুটি জলবিদ্যুৎ কেন্দ্রের মাধ্যমে ১৫শ' মেগাওয়াট বিদ্যুৎ উৎপাদন হবে। গতকাল ১৬ অক্টোবর রোববার সচিবালয়ে বাণিজ্য মন্ত্রণালয়ের

সম্মেলন কক্ষে এ ঘোষণা দেন বাংলাদেশের বাণিজ্যমন্ত্রী তোফায়েল আহমেদ ও নেপালের বাণিজ্যমন্ত্রী রোমি গাওচান থাকলি। এর আগে দুই দেশের বাণিজ্যমন্ত্রী দ্বিপক্ষীয় বৈঠক করেন। বাণিজ্যমন্ত্রী তোফায়েল আহমেদ বলেন, নেপালের সঙ্গে বাণিজ্য বাড়াতে দুই দেশের মধ্যে রেললাইন চালু করার বিষয়ে আলোচনা করা হয়েছে। সূত্র-ইত্তেফাক (পৃ.৩,ক.১), সমকাল (শেষ পৃ.,ক.৫), এশিয়ান এজ (পৃ.১১,ক.৬), নিউ নেশন (পৃ.১,ক.৩)।

৬। আগামী ৩০ ডিসেম্বরের মধ্যে ট্যানারি না সরালে
গ্যাস, পানি ও বিদ্যুৎ সংযোগ বন্ধ করা হবে : শিল্পমন্ত্রী

আগামী ৩০ ডিসেম্বরের মধ্যে যে কোনো মূল্যে রাজধানীর হাজারীবাগ থেকে ট্যানারি কারখানা সাভার চামড়া শিল্পনগরীতে স্থানান্তরের জন্য চূড়ান্ত সময়সীমা বেঁধে দিয়েছেন শিল্পমন্ত্রী আমির হোসেন আমু। নির্ধারিত এ সময়সীমার মধ্যে যেসব ট্যানারি মালিক হাজারীবাগ থেকে কারখানা সাভারে স্থানান্তর করতে পারবেন না, ২০১৭ সালের পহেলা জানুয়ারি থেকে কারখানায় গ্যাস, পানি ও বিদ্যুৎ সংযোগ বন্ধ করে দেওয়া হবে। শিল্পমন্ত্রী গতকাল ১৬ অক্টোবর রোববার সাভার চামড়া শিল্পনগরীতে অনুষ্ঠিত এক সভা শেষে এসব কথা বলেন। সূত্র-ইত্তেফাক (শেষ পৃ.,ক.৮), যুগান্তর (পৃ.১৫,ক.২), ইন্ডিপেনডেন্ট (পৃ.১,ক.৬), বাংলাদেশ টুডে (পৃ.১,ক.১)।

৭। তিন দিনের সফরে ঢাকায় বিশ্বব্যাপক প্রেসিডেন্ট

দারিদ্র্য বিমোচনে বাংলাদেশের সাফল্য দেখতে বিশ্বব্যাপকের প্রেসিডেন্ট জিম ইয়ং কিম এখন ঢাকায়। গতকাল ১৬ অক্টোবর রোববার ঢাকায় পৌঁছান তিনি। হযরত শাহজালাল আন্তর্জাতিক বিমানবন্দরে তাকে স্বাগত জানান অর্থমন্ত্রী আবুল মাল আবদুল মুহিত। এই সফরে ‘বিশ্ব দারিদ্র্য বিমোচন দিবস’ বাংলাদেশে পালনের পাশাপাশি ঢাকায় একটি বক্তৃতাও দেবেন তিনি। সূত্র-সংবাদ (পৃ.১,ক.১), ইত্তেফাক (পৃ.১,ক.১), ইন্ডিপেনডেন্ট (শেষ পৃ.,ক.১), বাংলাদেশ টুডে (পৃ.১,ক.৫)।

৮। যারা ভবিষ্যতের স্বপ্ন দেখে, তারাই ভবিষ্যৎ বিনির্মাণে সক্ষম

সাউথ এশিয়ান ইকোনমিক সামিটের সমাপনী অনুষ্ঠানে স্পিকার

সিপিএ চেয়ারপারসন ও জাতীয় সংসদের স্পিকার ড. শিরীন শারমিন চৌধুরী বলেছেন, যারা সুন্দর ভবিষ্যতের স্বপ্ন দেখে, তারাই ভবিষ্যৎ বিনির্মাণে সক্ষমতা অর্জন করে। গতকাল ১৬ অক্টোবর রোববার রাজধানীর একটি হোটেলে সেন্টার ফর পলিসি ডায়ালগ (সিপিডি) কর্তৃক আয়োজিত ‘নবম দক্ষিণ এশীয় অর্থনৈতিক সম্মেলনের’ (সাউথ এশিয়ান ইকোনমিক সামিট) সমাপনী অনুষ্ঠানে স্পিকার এসব কথা বলেন। কমনওয়েলথ পার্লামেন্টারি অ্যাসোসিয়েশনের (সিপিএ) নির্বাহী কমিটির চেয়ারপারসন ড. শিরীন শারমিন চৌধুরী বলেন, এ সংগঠনটি দক্ষিণ এশিয়ায় অর্থনৈতিক সম্পর্ক উন্নয়নের একটি প্রক্রিয়া। এ প্রক্রিয়ার মাধ্যমে দক্ষিণ এশিয়ার দেশসমূহে বাজার অর্থনীতি সচল, অর্থনৈতিক সংকট নিরসন, সুশাসন প্রতিষ্ঠা, মানবাধিকার উন্নয়ন, গণতন্ত্র প্রতিষ্ঠা, উদ্ভাবনী নীতিমালা গ্রহণ, বহুমুখী সুবিধা প্রণয়ন এবং শান্তি ও নিরাপত্তা নিশ্চিত করার মাধ্যমে এ অঞ্চলে সহযোগিতার নতুন দিগন্ত উন্মোচিত হবে। সূত্র-সংবাদ (শেষ পৃ.,ক.২), সমকাল (পৃ.১৯,ক.২), প্রথম আলো (পৃ.৩,ক.২)।

৯। তথ্যপ্রযুক্তি মেলা ‘ডিজিটাল ওয়ার্ল্ড-২০১৬’ শুরু হচ্ছে আগামী ১৯ অক্টোবর

দেশের সবচেয়ে বড় তথ্যপ্রযুক্তি মেলা ‘ডিজিটাল ওয়ার্ল্ড-২০১৬’ শুরু হচ্ছে আগামী ১৯ অক্টোবর। তিন দিনের এ মেলা চলবে ২১ অক্টোবর পর্যন্ত। মেলার উদ্বোধন করবেন প্রধানমন্ত্রী শেখ হাসিনা। এবারের মেলা শুরু হচ্ছে ‘নন স্টপ বাংলাদেশ’ স্লোগান নিয়ে। মেলায় সর্বাধিকসংখ্যক বিদেশী তথ্যপ্রযুক্তিবিদ উপস্থিত থাকবেন। গতকাল ১৬ অক্টোবর রোববার সচিবালয়ে তথ্য অধিদফতরের সম্মেলনকক্ষে তথ্যপ্রযুক্তি বিভাগ আয়োজিত ডিজিটাল ওয়ার্ল্ড-২০১৬ এর উপদেষ্টা কমিটির সদস্য হিসেবে সংবাদ সম্মেলনে অংশ নিয়ে তথ্যমন্ত্রী হাসানুল হক ইনু এ তথ্য জানিয়েছেন। সূত্র-জনকণ্ঠ (পৃ.১,ক.৮), ইনকিলাব (পৃ.৩,ক.৩), বাংলাদেশ টুডে (পৃ.৩,ক.২), ডেইলি সান (শেষ পৃ.,ক.৮)।

১০। বিশ্ব ক্ষুধা সূচকের তালিকায় বাংলাদেশ ৯০তম

ইন্টারন্যাশনাল ফুড পলিসি রিসার্চ ইনস্টিটিউট গত সপ্তাহে যে বিশ্ব ক্ষুধা সূচক প্রকাশ করেছে, তাতে ১১৮টি দেশের মধ্যে বাংলাদেশের অবস্থান ৯০তম এবং স্কোরের দিক দিয়ে উন্নতি হয়েছে। এই সংস্থার ২০০৮ সালের প্রতিবেদনে বাংলাদেশের স্কোর যেখানে ছিল ৩২ দশমিক ৪ এবার তা কমে ২৭ দশমিক ১ হয়েছে। দক্ষিণ এশিয়ার দেশগুলোর মধ্যে বাংলাদেশ এই সূচকে ভারত, পাকিস্তান ও আফগানিস্তানের চেয়ে এগিয়ে আছে। সূত্র-ইনকিলাব (পৃ.৩,ক.৭), অবজারভার (শেষ পৃ.,ক.৪), নিউজ টুডে (পৃ.১,ক.১)।

১১। দেশের ১৮ জেলায় আরও ২৩টি বেসরকারি কলেজ জাতীয়করণ হচ্ছে

দেশের ১৮ জেলায় আরও ২৩টি বেসরকারি কলেজ জাতীয়করণ হচ্ছে। ২৩টি উপজেলায় একটি করে কলেজকে জাতীয়করণের সিদ্ধান্ত নিয়েছে সরকার। প্রধানমন্ত্রী শেখ হাসিনা গত ৯ অক্টোবর এ বিষয়ে সম্মতি দিয়েছেন। এরপর প্রধানমন্ত্রীর কার্যালয় থেকে কলেজগুলোর তালিকা দিয়ে এ ব্যাপারে প্রয়োজনীয় ব্যবস্থা নিতে শিক্ষা মন্ত্রণালয়কে নির্দেশ দেওয়া হয়েছে, যার অনুলিপি মাধ্যমিক ও উচ্চ শিক্ষা অধিদফতরের (মাউশি) মহাপরিচালককেও দেওয়া হয়েছে। গতকাল ১৬ অক্টোবর রোববার এ সংক্রান্ত নির্দেশনা মাউশির কাছে পাঠানো হয়েছে। মাউশি এখন নিয়ম অনুযায়ী এসব কলেজ পরিদর্শন করে মন্ত্রণালয়ে প্রতিবেদন প্রদান করবে। পরে শিক্ষা মন্ত্রণালয় এ বিষয়ে জাতীয়করণের আদেশ জারি করবে। সূত্র-সংবাদ (পৃ.১,ক.৩), সমকাল (পৃ.২,ক.৩), যায়যায়দিন (শেষ পৃ.,ক.৫), যুগান্তর (শেষ পৃ.,ক.৪)।

সম্পাদকীয়

- ক. সংবাদ, সমকাল, প্রথম আলো, ইনকিলাব, যুগান্তর, ভোরের কাগজ, ইন্ডিপেনডেন্ট : ঢাকা মেডিকেল কলেজ হাসপাতালের ফটকে অ্যাম্বুলেন্সের চাপার পাঁচজন নিহত হওয়ার ঘটনা তুলে ধরে সংশ্লিষ্ট কর্তৃপক্ষকে হাসপাতালের অবৈধ অ্যাম্বুলেন্সের সিডিকেট ব্যবসার বিষয়টিকে আমলে নিয়ে কার্যকর ব্যবস্থা গ্রহণের সুপারিশ।
- খ. ইত্তেফাক : রেললাইনে দুর্ঘটনা প্রতিরোধে রেল ক্রসিংগুলো সুরক্ষিত করার পাশাপাশি রেললাইনের উপর দিয়ে বেপরোয়া ও অসতর্ক চলাচল থামাতে যথাযথ পদক্ষেপ গ্রহণ জরুরি বলে অভিমত।
- গ. জনকণ্ঠ : ইলিশ মাছ ধরা জেলেরা যেন সরকারি প্রদত্ত সুযোগ-সুবিধা ও ন্যায্য পাওনা থেকে বঞ্চিত না হয় তা নিশ্চিত করার আহ্বান।
- ঘ. সমকাল : বকেয়া কৃষিক্ষেত্র আদায়ে ব্যাংকের সংশ্লিষ্ট বিভাগের কর্মী এবং ব্যাংক নিয়োজিত আইন বিভাগের কর্মীরা তাদের দায়িত্ব সঠিকভাবে পালন করেছেন কি-না তার অনুসন্ধান দরকার বলে অভিমত।
- ঙ. যুগান্তর : তৈরি পোশাকশিল্পসহ গাজীপুরের বিশাল শিল্পাঞ্চল গ্যাস সংকটের কারণে অচল হয়ে পড়ায় এ শিল্পাঞ্চলে গ্যাস সরবরাহ স্বাভাবিক করা না হলে পরিস্থিতি দ্রুত অবনতি ঘটায় আশঙ্কা প্রকাশ।
- চ. প্রথম আলো : কক্সবাজারের বেহাল টেকনাফ-শাহপারীর দ্বীপ সড়ক দ্রুত সংস্কারের উদ্যোগ নেওয়ার সুপারিশ।
- ছ. ইন্ডিপেনডেন্ট : খাদ্যপণ্যে ফরমালিনসহ অন্যান্য রাসায়নিকের প্রভাব সম্পর্কে ব্যাপক জনসচেতনতা গড়ে তুলে এসবের ব্যবহার প্রতিরোধ করার ব্যবস্থা করার সুপারিশ।
- জ. ডেইলি সান : অধ্যাপক জাফর ইকবাল ও তার স্ত্রী অধ্যাপক ইয়াসমিন হক এবং অধ্যাপক আনু মুহাম্মদের মতো প্রগতিশীল ব্যক্তিদের মৃত্যু হুমকি দেওয়ার পরিপ্রেক্ষিতে তাদের নিরাপত্তায় যথাযথ ব্যবস্থা গ্রহণের আহ্বান।
- ঝ. নিউজ টুডে : টেকসই খাদ্য নিরাপত্তা নিশ্চিত করতে জলবায়ু পরিবর্তনের সঙ্গে সামঞ্জস্য করে খাদ্য ও কৃষিক্ষেত্রে অধিক বিনিয়োগ ও ভর্তুকি দেওয়ার ওপর গুরুত্বারোপ।
- ঞ. নিউ এজ : মোবাইলে আসক্ত তরুণ সমাজ দিনের প্রায় ১২ ঘণ্টা মোবাইলের নানা কাজে ব্যয় করায় সরকারকে দ্রুত এ ব্যাপারে যথোপযুক্ত পদক্ষেপ নেওয়ার সুপারিশ।
- ট. নিউ নেশন : ই-বর্জ্য দিনদিন জনস্বাস্থ্যের জন্য হুমকি হয়ে পড়ায় যথাযথ কর্তৃপক্ষকে এসব বর্জ্যের যথাযথ ব্যবস্থাপনার ব্যাপারে ব্যাপক জনসচেতনতা গড়ে তোলার আহ্বান জানিয়ে সম্পাদকীয় প্রকাশ করেছে।

উপ-সম্পাদকীয়

সমকাল পত্রিকায় প্রকাশিত কলামে দারিদ্র্য নিরসনে শিক্ষা ও স্বাস্থ্য খাতের গুণগত মান ও দক্ষতা বৃদ্ধির বিকল্প নেই বলে উল্লেখ করা হয়েছে।

নিবন্ধ ও ফিচার

ইত্তেফাক পত্রিকায় প্রকাশিত 'বাংলাদেশের স্বপ্ন-সাধনা' শিরোনামের নিবন্ধে আমিনুল ইসলাম মিলন অতি আধুনিকতার ও মুক্ত চিন্তার নামে ধর্মের অবমাননা যেমন নিন্দনীয়, তেমনি ধর্মীয় গোঁড়ামি, ধর্মের বিকৃতি ও জঙ্গি-কার্যক্রম ও নিন্দনীয় বলে অভিমত প্রকাশ করেছেন।

#

ফারহানা/শুকলা/মরজিনা/রশীদ/আফরোজা/২০১৬/৯.০০ ঘণ্টা

